

四庫全書

子部

欽定四庫全書

子部

冊府元龜卷一百六十三至
六

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣宋枋遠

謄錄監生臣任楫文

欽定四庫全書

冊府元龜卷一百六十三

宋

王欽若等

撰

帝王部

招懷

傳曰招攜以禮懷遠以德賈誼所謂降者親酌而手食
之以懷其心乃五餌之一也蓋王者創業垂統握契御
辯征不諛討不庭推亡固存式遏亂畧必使威加于外
信著于內桀驚革心英俊又用輔成大業光昭帝圖如

斯而已矣故其始也或喻之以文告或結之以要誓推
心置腹曠然不疑分茅胙土待之不次以至賜田宅以
安之錫滅獲以寵之其旨也

漢高祖五年十二月既平項籍齊王田橫懼誅與其徒
屬五百餘人入海居嶋中

海中
曰嶋

帝聞之以橫兄弟本

定齊齊人賢者多附焉今在海中不收後恐有亂廼使
使赦橫罪而召之橫謝曰臣烹陛下之使酈食其今聞
其弟商為漢將而賢臣恐懼不敢奉詔請為庶人守海

鳴中使還報帝迺詔衛尉酈商曰齊王橫即至人馬從

者敢動搖者致族夷

言平除其族

迺復使使持節具告以詔

意曰橫來大者王少者乃侯耳

大者謂橫身少者其徒屬

不來且發

兵加誅橫迺與其客二人乘傳詣雒陽

十年九月代相國陳豨反帝東至邯鄲令周昌選趙壯

士可令將者白見四人

白於天子而召見也

帝嫚罵曰

嫚者溲汗也

豎

子能為將乎四人慙皆伏地帝封各千戶以為將左右

諫曰從入蜀漢伐楚賞未徧行今封此何功帝曰非汝

所知陳豨反趙代地皆豨有吾以羽檄徵天下兵未有

至者

檄者以木簡為書長尺二寸用徵召也其有急事則加以鳥羽插之示速疾也魏武奏事云今邊有

警輒露插羽徵

今計唯獨邯鄲中兵耳吾何愛四千戶不以慰

趙子弟皆曰善

十一年五月詔曰粵人之俗好相攻擊前時秦徙中縣之民南方三郡使與百粵雜處會天下誅秦南海尉阨居南方長治之甚有文理中縣人以故不耗減粵人相攻擊之俗益止俱賴其力今立阨為粵王使陸賈即授

璽綬陟稽首稱臣

文帝元年以南粵王陟親屬在真定廼為置守邑

親謂父母

也

歲時奉祀召其從昆弟尊官厚賜寵之詔丞相陳平

舉可使粵者平言陸賈先帝時使粵帝召賈為大中大

夫謁者一人為副使賜陟書曰皇帝謹問南粵王甚苦

心勞意朕高皇帝側室之子

言非正嫡所生也

棄外奉北藩于

代道里遼遠壅蔽樸愚未嘗致書

言未得通使於粵

高皇帝棄

羣臣孝惠皇帝即世高后自臨事不幸有疾日進不衰

言疾病益甚也

以故詩暴乎治

詩垂也

諸呂為變故亂法不能獨

制迺取他姓子為孝惠皇帝嗣賴宗廟之靈功臣之力

誅之已畢朕以王侯吏不釋之故

辭讓帝位不見置也

不得不立

今即位乃者聞王遺將軍隆慮侯書求親昆弟請罷長

沙兩將軍

隨之昆弟在故鄉者求訪之而兩將軍將兵繫城者請罷之以賓附於漢也言親昆弟者

謂有服屬者也

朕以王書罷將軍博陽侯親昆弟在真定者已

遣人存問修治先人冢前日聞王發兵於邊為寇灾不

止當其時長沙苦之南郡尤甚雖王之國庸獨利乎

言越

兵寇邊長沙南郡皆厭苦之而漢軍亦當相拒方有戰鬪於越亦非利也必多殺士卒傷良

將吏寡人之妻孤人之子獨人父母得一亡十朕不忍

為也朕欲定地犬牙相入者以問吏吏曰高皇帝所以

介長沙土也介隔也朕不得擅變焉吏曰得王之地不足

以為大得王之財不足以為富服嶺以南王自治之嶺山

名也長沙南界也雖然王之號為帝兩帝竝立亡一乘之使以

通其道是爭而不讓仁者不為也願與王分棄前患彼此

共棄故終今以來通使如故從今通使至於終久故云今以來也故使賈

馳諭告王朕意王亦受之母為寇灾矣上褚五十衣中

褚三十衣下褚二十衣遺王

以絲裝衣曰褚上中下者
絲之多少薄厚之差也

願王聽樂娛憂存問鄰國

謂東越及
甌路等

陸賈至南粵王恐

乃頓首謝願奉明詔長為藩臣奉貢職因使者獻白璧

一雙翠鳥千犀角十紫貝五百桂蠹一器

桂樹中蝸虫
也漢書常以

獻陵廟載以赤穀小車此虫食
桂故味辛而漬之以蜜食之也

生翠四十雙孔雀二雙

平帝元始二年募汝南南陽勇敢吏士三百人諭說江

湖賊成重等二百餘人皆自出送家在所收事

言身既
自出又

各送其家人詣本屬縣邑從賊役耳

重徙雲陽

重成重也作賊長帥故徙之也

賜公田宅

後漢光武建元元年九月辛卯朱鮪舉城降初帝即位拜岑彭廷尉行大將軍事與大司馬吳漢大司空王梁建義大將軍朱祐右將軍侯進偏將軍馮異祭遵王霸等圍雒陽數月朱鮪等堅守不肯下帝以彭嘗為鮪校尉令往說之鮪在城上彭在城下相勞苦歡語如平生彭因曰彭往者得執鞭侍從蒙薦舉拔擢常思有以報恩今赤眉已得長安更始為三王所反皇帝受命平定

燕趙盡有幽冀之地百姓歸心賢俊雲集親率大兵來攻雒陽天下之事逝其去矣公雖嬰城固守將何待乎

鮪曰大司徒被害時鮪與其謀

與音預

又諫更始無遣蕭

王北伐誠自知罪深彭還具言於帝帝曰夫建大事者不忌小怨鮪今若降官爵可保况誅罰乎河水在此吾

不食言

指河以為信言其明白也

彭復往告鮪從城上下索曰必信

可乘此上彭趣索上鮪見其誠即許降後五日鮪將輕騎詣彭顧敕諸部將曰堅守待我我若不還諸君徑將

大兵上輟轅歸鄆王乃面縛與彭俱詣河陽帝即解其縛召見之復令彭夜送鮪歸城明旦悉其衆出降拜鮪為平狄將軍封扶溝侯

二年正月更始復漢將軍鄧畢輔漢將軍于康降皆復爵位

三年西州大將軍隗囂奉奏帝素聞其風聲報以殊禮言稱字用敵國之儀所以慰藉之良厚

慰安也藉薦也言安慰而薦藉

之良甚也初囂據涼州鄧禹承制遣使持節命囂為西州大

將軍得專制涼州朔方事及赤眉去長安欲西上隗囂
遣將軍楊廣迎擊破之又追敗之於烏氏涇陽間囂既
有功於漢又受鄧禹爵署其腹心議者多勸通使京師
囂乃上書詣闕時陳倉人呂鮪擁衆數萬與公孫述通
寇三輔囂復遣兵佐征西大將軍馮異擊之走鮪遣使
上狀帝報以手書曰慕樂德義思相結納昔文王三分
猶服事殷但駕馬鈇刀不可強扶數蒙伯樂一顧之價
而蒼蠅之飛不過數步即託驥尾得以絕羣隔於盜賊

聲聞不數將軍操報款誠扶傾救危南拒公孫之兵北御羌胡之亂是以馮異西征得以數千百人躑躅三輔微將軍之助則咸陽已為他人禽矣今關東寇賊往往屯聚志務廣遠多所不暇未能觀兵成都與子陽角力

臣欽若等曰子陽公孫述字也

如今子陽到漢中三輔願因將軍兵馬

鼓旗相當儻肯如言蒙天之福即智士計功割地之秋也管仲曰生我者父母成我者鮑子自今以後手書相聞勿用傍人解構之言自是恩禮愈篤其後公孫述數

出兵漢中遣使以大司空扶安王印綬授囂囂自以與
述敵國耻為所臣乃斬其使出兵擊之連破述軍以故
蜀兵不復北出是年劉永將慶吾斬永首降封吾為列
侯帝又徵馮魴為虞令魴當王莽末四方潰畔聚賓客
招豪傑作營塹以待所歸待真主也時天下未定而四
方之士擁兵矯稱者甚眾唯魴自守兼有方略帝聞而
嘉之徵詣行在所見於雲臺拜官

五年四月河西大將軍竇融始遣使貢獻帝賜融璽書

黃金二百斤授涼州牧後融與五郡大守共砥厲兵馬

上疏請師期以討隗囂帝深嘉美之賜融外屬圖及大

史公五宗外戚世家

景帝子十三人為王而冊五人同母者為一宗故曰五宗言景帝以

竇氏所生而致子孫衆多也

魏其侯列傳詔報曰每追念外屬孝景

皇帝出自竇氏定王景帝之子朕之所祖昔魏其一言

繼統以正長君少君遵奉師傅脩成淑德施及子孫

延施

也音羊
跋切

此皇太后神靈上天祐漢也從天水來者寫將

軍所讓隗囂書痛入骨髓叛臣見之當股慄慙愧忠臣

則酸鼻流涕義士則曠若發矇非忠孝慈誠孰能如此
豈其德薄者所能克堪竊自知失河西之助族禍將及
欲設間離之說亂惑其心轉相解構以成其姦又京師
百僚不曉國家及將軍本意多能採取虛偽誇誕妄談
令忠孝失望傳言乖實毀譽之來皆不徒然不可不思
今關東盜賊已定大兵今當悉西將軍其抗厲威武以
應期會融被詔即與諸郡守將兵入金城後融歸朝拜
冀州牧尋遷大司空

十月好時候耿弇等擊破張步軍於臨淄步走還劇帝

勞軍至臨淄謂弇曰田橫烹酈生及田橫降高帝詔衛

尉不聽為仇張步前亦殺伏隆

仁年帝遣隆諭步步殺之

若步來歸

命吾當詔大司徒釋其怨

大司徒湛即隆父

步乃肉袒負斧鑕

於軍門封安兵侯

十二月西州大將軍隗囂遣長子恂入侍帝以為胡騎

校尉封鐫羗侯

鐫謂鐫鑿

六年帝與公孫述書曰圖讖言公孫即宣帝也代漢者

當途高君豈高之身邪

一云光武與述書曰承赤者書也姓當途其名高也

乃復

以掌文為瑞

時述妄引讖記乃刻其掌文曰公孫帝也

王莽何足效乎君非

吾賊臣亂子倉卒時人皆欲為君事耳何足數也君日

月已逝妻子少當早為定計可以無憂天下神器不可

力爭宜留三思署曰公孫皇帝述不答是年隗囂使周

游詣闕先到馮異營游為仇家所殺帝遣衛尉鉞期持

珍寶繒帛賜囂期至鄭被盜

鄭今華州縣是

亡失財物帝稱囂

長者務欲招之聞而歎曰吾與隗囂事欲不諧使來見

殺得賜道亡帝復使來歙至汧陽賜隗囂書曰昔柴將軍

與韓信書云

柴將軍柴武也韓信韓王也信入匈奴武與韓書也

陛下寬仁諸侯

雖有亡叛而後歸輒復位號不誅也以囂文吏曉義理
故復賜書深言則似不遜略言則事不決今若束手復
遣恂弟歸闕庭者則爵祿獲全有浩大之福矣

浩亦大也吾

年垂四十在兵中十歲厭浮語虛辭即不欲勿報

七年以隗囂所署明威將軍王遵為大中大夫遵字子
春霸陵人雖與囂舉兵而常有歸漢意囂既稱臣於公

孫述帝因令來歙以書詔遵乃與家屬東詣京師拜為

大中大夫封尚義侯

一云遵降封乙誰侯

是冬盧芳

臣欽若等曰芳王莽末起

兵為西平匈奴單于立為漢帝

所置朔方太守田颯雲中太守喬扈各

舉郡降帝令領職如故

八年隗囂大將十三人衆十餘萬降囂奔西城帝復詔告隗囂曰若束手自詣父子相見保無他也高皇帝云橫來大者王小者侯若遂欲為黥布者亦自任也

十二年公孫述弟恢及子壻史興並為大司馬吳漢輔

威將軍滅宮所破戰死自是將帥恐懼日夜離叛述雖
誅滅其家猶不能禁帝必欲降之乃下詔諭述曰往年
詔書北下開示恩信勿以來歟岑彭受害自疑今以時
自詣則家族完全若或不諭委肉虎口痛哉奈何將帥
疲倦吏士思歸不樂久相屯守詔書手記不可數得朕
不食言述終無降意

是歲盧芳將隨昱欲脅芳降芳知心膂內潰遂亡入匈
奴其衆盡歸昱乃隨使者程恂詣闕叙昱為五原太守

封鑄胡侯昱弟慮武侯

十六年盧芳入居高柳

縣名故城在定襄縣

與閔堪兄林使使請

降乃封芳代王堪為代相林為代太傅賜繒二萬疋因使知和集匈奴

魏太祖為漢大將軍建安四年四月圍射於長楊故長史薛洪河內太守繆尚率衆降封為列侯

十一月張繡率衆降封為列侯

十二月袁術所署廬江太守劉勲率衆降封為列侯

八年十月袁尚將呂曠呂詳叛尚屯陽平率其衆降封

為列侯

是年吳以太史慈為建昌都尉治海昏太祖具名遺慈書以篋封之發省無所道而但貯當歸

十年正月袁熙大將焦觸張南等叛攻熙熙并弟尚奔

三郡烏丸觸等舉其縣降封為列侯

四月黑山賊張燕率其衆十餘萬降封為列侯

十三年七月太祖征劉表八月表卒其子琮嗣屯襄陽

大將蒯越從事中郎韓嵩東曹掾傅巽等說琮歸太祖

後太祖軍到襄陽琮舉州降太祖以琮為青州刺史封

列侯蒯越等侯者十五人越為光祿勳韓嵩大鴻臚鄧
羲侍中劉先尚書令其餘多至大官又以表大將文聘
為江夏太守使統本兵

十六年十月北征楊秋圍安定秋降復其爵位使留撫
其民人

二十年七月破漢中賊帥程銀侯選詣太祖降皆復官
爵銀選及李堪皆河東人興平之亂各有衆千餘家並
與馬超合超破走堪臨陣死銀選南入漢中至是來降

十一月張魯自巴中將其餘衆降封魯及五子皆為列侯

文帝初為魏王延康元年五月馮翊山賊鄭甘王炤率

衆降皆封列侯

魏書曰初鄭甘王炤及盧水胡率其屬來降王得降書以示朝曰前欲有令吾

討鮮卑者吾不從而降又有欲使吾及今秋討盧水胡者吾不聽今又降昔魏武侯一謀而當有自得之色見譏李悝吾今說此非自是也徒以為坐而降之其功大於動兵革也

七月蜀將孟達率衆降帝自筆手令曰吾前遣使宣國威靈而達即來吾惟春秋褒儀父即封并遣使還領新

城太守近復有扶老攜幼首向王化者吾聞風沙之民
自縛其君以歸神農幽國之衆襁負其子而入鄴錫斯
豈區略迫脅之所致哉乃風化動其情而仁義感其衷
歡心內發使之然也以此而推西南將萬里無外權備
將與誰守死乎

臣欽若等曰權
備謂吳蜀主也

黃初三年八月蜀大將黃權及嶺南郡太守史劭等三
百一十八人詣荊州刺史奉上所假印綬祭戟幢麾牙
門鼓車權等詣行在所在帝置酒設樂引見於承光殿

權郤等人人前自陳帝為論說軍旅成敗去就之分諸將無不喜悅賜權金帛車馬衣裘帷帳妻妾下及偏裨皆有差拜權為侍中鎮南將軍封列侯即日詔使驂乘及封史郤等四十二人皆為列侯為將軍郎將者百餘人

明帝大和二年蜀將諸葛亮寇遑帝幸長安露布天下并班告益州曰劉備背恩自竄巴蜀諸葛亮棄父母之國阿殘賊之黨神人被毒惡積身滅亮外慕立孤之名

而內貪專擅之實劉升之兄弟空城而已亮又悔易益
土虐用其民是以利狼宕渠高定清羗莫不瓦解為亮
仇敵而亮反裘負薪裹盡毛殫刑趾適屨刻肌傷骨反
更稱說自以為能行兵於井底游步於牛蹄自朕即位
三邊無事猶哀憐天下數遭兵革且欲養四方之耆老
長後生之孤幼先移風於禮樂次講武於農隙置亮度
外未以為虞而亮懷季熊愚勇之智不思荊邯度德之
戒驅畧吏民盜利祁山王師方振膽破氣奪馬謖高祥

望旗奔敗虎臣逐北蹈尸涉血亮也小子震驚朕師猛
銳踴躍咸思長驅朕惟率土莫非王臣師之所處荆棘
生焉不欲使十室之邑忠信貞良與夫淫昏之黨同受
塗炭故先開示以昭國誠勉思變化無滯亂邦巴蜀將
吏士民諸為亮所劫追公卿已下皆聽束手

是年魏興太守申儀來朝拜樓船將軍在禮請中初儀
兄耽漢末在西平上庸間聚數千家後與張魯通又遣
使詣太祖加其號為將軍因使領上庸都尉至建安末

為蜀所攻以其郡西屬黃初中儀復來還詔即以兄散
號加儀因拜魏興太守封侯後與新城太守孟達不和
數上言達有二心於蜀及達反儀絕蜀道使救不到達

死後儀詣宛見司馬宣王勸使來朝故有是命

一云儀久在魏

興專威疆場輒承制刻印多所假綬孟達既誅自有疑
心時諸郡守以司馬宣王新克捷奉禮求賀皆聽之宣
王使人諷儀儀至問承
制狀執之歸于京師

青龍元年遼東太守公孫淵通於孫權國家知淵兩端
而恐遼東吏民為淵所誤故公文下遼東因赦之曰告

遼東玄菟將校吏民逆賊孫權遭遇亂階因其先人劫掠州郡遂成羣凶自擅江表含垢藏疾冀其可化故割地王權使南面稱孤位以上將禮以九命權親又手北面稽顙假人臣之寵受人臣之榮未有如權者也狼子野心告令難移卒歸反覆背恩叛主滔天逆神乃敢僭號恃江湖之險阻王誅未加比年已來復遠遣樓船越渡大海多持貨物誑誘邊民邊民無知與之交關長吏以下莫肯禁止至使周賀浮舟百艘沈滯津岸貿遷有

無既不疑拒齋以名馬又使宿舒隨賀通好十室之邑
猶有忠信陷君於惡春秋所書也今遼東玄菟奉事國
朝紆青拖紫千百為數戴纒垂纓咸佩印綬曾無規正
納善之言龜玉毀於匱虎兕出於匣是誰之過歟國朝
為子大夫羞之昔狐突有言父教子貳何以事君策名
委質貳乃辟也今乃阿順邪謀脅從姦惑豈獨父兄之
教不詳子弟之舉習非而已哉若苗穢害田隨風烈火
芝艾俱焚安能自別乎且又此事固然易見不及鑒古

成敗書傳所載也江南海北有萬里之限遼東君臣無
怵惕之患利則義所不利貴則義所不貴此為厭安樂
之居求危亡之禍賤忠貞之節重背叛之名鬻貊之長
猶知愛禮以此事人亦難為顏且又宿舒無罪擠使入
吳奉不義之使始與家訣涕泣而行及至賀死之日覆
衆成山舒雖脫死魂魄離身何所逼迫乃至於此今忠
臣烈將咸忿遼東反覆攜貳皆欲乘桴浮海期於肆志
朕為天下父母加念天下新定既不欲勞動干戈遠涉

大川費役如彼又悼遑陞遺餘黎民迷誤如此故遣郎中衛慎邵瑁等且先奉詔示意若股肱忠良能效節立信以輔時君反邪就正以建大功福莫大焉儻恐自嫌已為惡逆所見染污不敢倡言永懷伊戚其諸與賊使交通皆赦除之與之更始是歲公孫淵斬送孫權所遣使張彌許晏首帝於是拜淵大司馬封樂浪公持節領郡如故

高貴鄉公甘露二年六月乙巳詔吳使持節都督夏口

將軍事鎮軍將軍沙羨侯孫壹賊之枝屬位為上將畏
天知命深鑒禍福翻然與衆遠歸大國雖微子去殷樂
毅遁燕無以加之其以壹為侍中車騎將軍假節交州
牧吳侯開府辟召儀同三司依古侯伯八命之禮袞冕
赤舄事從豐厚

陳留王咸熙元年九月辛未詔曰吳賊政刑暴虐賦斂
無極孫休遣使鄧句勅交趾太守鎖送其民發以為兵
吳將呂興因民心憤怒又承王師平定巴蜀即糾合豪

傑誅除句等驅逐太守長史撫和吏民以待國命九真
日南郡聞興去逆即順亦齊心響應與興協同興移書
日南州郡開示大計兵臨合浦告以禍福遣都尉唐譜
等詣進乘縣因南中都督護軍霍弋上表自陳又交阯
將吏各上表言興創造事業大小承命郡有山寇入連
諸郡懼其計異各有攜貳權時之宜以興為督交阯諸
軍事上大將軍定安縣侯乞賜褒獎以慰邊荒乃心款
誠形於辭旨昔儀父朝魯春秋所美竇融歸漢待以殊

禮今國威遠震撫懷六合方包舉殊裔混一四表興首
向王化舉衆稽服萬里馳義請吏帥職宜加寵遇崇其
爵位既使興等懷忠感悅遠人聞之必皆競勸其以興
為使持節都督交州諸軍事南中大將軍封定安縣侯
得以便宜從事先行後上策命未至興為下人所殺
十月丁亥詔曰昔聖帝明主靜亂濟世保大定功文武
殊塗勲烈同歸是故或舞干戚以訓不庭或陳師旅以
威暴慢至於愛民全國康惠庶類必先脩文教示之軌

儀不得已然後用兵此盛德之所同也往者季漢分離
九土顛覆劉備孫權乘間作禍三祖綏寧中夏日不暇
給遂使遺寇僭逆歷世幸賴宗廟威靈宰輔忠武爰發
四方拓定庸蜀役不浹時一征而克自頃江表衰弊刑
政荒闇巴漢平定孤危無援交荆揚越靡然向風今交
趾偽將呂興已帥三郡萬里歸命武陵邑侯相嚴等糾
合五縣請為臣妾豫章廬陵山民舉衆叛吳以助北將
軍為號又孫休病死主帥改易國內乖違人各有心偽

將施績賊之名臣懷疑自猜深見忌惡衆叛親離莫有固志自古及今未有亡徵若此之甚若六軍震曜南臨江漢吳會之域必扶老攜幼以迎王師必然之理也然興動大衆猶有勞費宜告諭威德開示仁信使知順附和同之利相國叅軍事徐紹水曹掾孫或昔在壽春並見虜獲紹本偽南陵督才質開壯或孫權支屬忠良見事其遣紹南還以或為副宣揚國命告諭吳人諸所示語皆以事實若其覺悟不損征伐之計蓋廟勝長筭自

古之道也其以紹兼散騎常侍加奉車都尉封都亭侯
或兼給事黃門侍郎賜爵關內侯紹等所賜妾及男女
家人在此者悉聽自隨以明國恩不必使還以開廣大
信

晉武帝泰始八年吳西陵督步闡來降拜衛將軍開府
儀同三司封宜都公

咸寧二年六月吳京下督孫階帥衆來降以為車騎將
軍封丹陽侯

成帝時涼州牧張駿遣護羌叅軍陳寓從事徐虓華馭等至京師征西大將軍庾亮上疏曰陳寓等冒險遠至宜蒙銓叙詔除寓西平相虓等為縣令

孝武帝時涼州牧張天錫既降苻堅後堅寇淮南大敗于淮肥時天錫為苻融征南司馬於陣歸國詔曰昔孟明不替終顯厥功豈以一眚而廢才用其以天錫為散騎常侍左員外

後魏道武皇始二年二月幸陽城大破慕容寶衆寶所

署尚書閔亮秘書監崔逞太常孫沂殿中侍御史孟輔等並降降者相屬賜拜職爵各有差初其將張驥李况慕容文等先來降尋皆亡還是日復獲之皆赦而不問三月慕容寶走和龍寶燕郡太守高湖率戶三千歸國帝賜爵東阿侯加右將軍總代東諸部

五月以中山城內為慕容普隣所脅而大軍迫之欲降無路乃密招諭之是歲寶鉅鹿太守高嘗率郡降賜爵經縣侯加龍驤將軍仍守鉅鹿以寶唐郡內史遼東公

子文括弟一客是時代人薛達顯自姚萇率部落歸國
帝嘉其忠欵賜爵聊城侯散員大夫待以上客之禮達
顯閑雅恭慎帝深器之

明元太常二年八月宋滅姚泓渤海刁雍等歸國上表
陳誠於南境自効帝許之假雍建義將軍

十二月詔河東河內有姚泓子弟播越民間能有送致
京師者賞之

七年山陽公奚斤南討軍至潁川宋陳留太守嚴稜率

文武五百人詣斤降驛送稜朝帝於冀州嘉其誠欵拜平遠將軍賜爵邵陽侯假荊州刺史隨駕南征還為上客是時赫連昌寧東將軍費峻率衆來降拜龍驤將軍賜爵健為公

大武神麴四年二月冠軍將軍安頡等平滑臺擒宋將朱修之帝善其固守授以內職以宗室女妻之

延和元年七月代和龍馮跋石城太守李崇率十餘郡歸降帝甚禮之呼曰李公以崇為平西將軍北幽州刺

史固安侯

是年河西王禿髮儁檀子保周棄沮渠蒙遜來奔以保周為張掖公

太延五年九月西征涼士乞伏西秦大夏鎮將嘗但子奘與兄仕國歸款軍門帝嘉之賜仕國爵五品顯美男奘為六品拜宣威將軍

太平真君元年八月沮渠無諱降尋拜為征西大將軍涼州牧酒泉王

三年四月涼武昭王孫李寶據燉煌遣使內附十二月
遣使授寶使持節侍中都督西垂諸軍事鎮西大將軍
開府儀同三司領護西戎校尉沙州牧燉煌公仍鎮燉
煌四品以下聽承制假授寶隴西狄道人伯父歆為沮
渠蒙遜所滅寶徙於姑臧歲餘隨舅唐契北奔伊吾臣
於蠕蠕其遺民歸附者稍至二千寶傾身禮接甚得其
心衆皆樂為用每希報雪屬帝遣將討沮渠無諱於燉
煌無諱捐城遁走寶自伊吾南歸燉煌遂修繕城府規

復先業遣弟懷達奉表歸誠帝嘉其忠款故有是拜仍以懷達為散騎常侍燉煌太守

十一年十一月南伐至鄒山太守鉅平人羊祉與魯郡太守崔耶利及其屬縣徐遜愛猛之等俱降賜祉爵鉅平子拜鴈門太守是時合鄉令張忠歸降賜爵新昌男拜新興太守高育為馮文通建德令值太武東封率其所部五百餘家歸命軍門帝授以建德將軍齊郡建德二郡太守賜爵服如子

獻文即位初遼東高崇歸國賜爵陽關男居遼東詔以沮渠牧犍女賜潛為妻封武威公主拜駙馬都尉

天安元年九月宋徐州刺史薛安都以彭城內屬宋將張允沈攸之繫安都詔北部尚書尉元為鎮戍大將軍都督諸軍事孔伯恭為副出東道救彭城時宋明帝自立羣情不協共立前廢帝弟晉安王子勛安都與沈文秀崔道固常珍奇等舉兵應之明帝遣將張永等討安都安都遣使來降請兵救援帝召羣臣議之羣官咸曰

昔世祖嘗有并儀隆之心

臣欽若等曰世祖太祖謚儀隆宋文帝名

故親御

六軍遠臨江浦今江南阻亂內外離心安都今者求降
千載一會機事難遇時不可逢取亂侮亡於是乎在帝
納之安都又遣第四子道次為質并與李敷等書絡繹
相繼乃遣尉元等率騎一萬赴之拜安都使持節散騎
常侍都督徐南北兖州青冀五州豫州之梁郡諸軍事
鎮南大將軍徐州刺史賜爵江東公勅安都之子散騎
常侍駙馬都尉拔詣彭城勞迎除拔冠軍將軍南豫州

刺史

十一月宋兗州刺史畢衆敬遣使內屬

皇興元年閏正月宋青州刺史沈文秀冀州刺史崔道
固竝遣使請舉州內屬詔平都將軍長孫陵南平將軍
侯窮竒赴援之

二年二月鎮東大將軍尉元討徐州羣盜平之宋冠軍
將軍東徐州刺史張讜順於元元亦表授冠軍東徐州
刺史遣中書侍郎高閤與讜對為刺史

是年薛安都與畢衆敬朝于京師見大禮重子姪羣從
竝處上客皆封侯至于門生無不收斂焉又為起第宅
館宇崇麗資給甚厚安都從祖弟真度初與安都南奔
及安都為徐州真度為長史頗有勇幹為其爪牙從安
都來降為上客衆敬弟衆愛隨兄歸國以勲為第一客
賜鉅平侯衆敬子元賓爵須昌侯加平遠將軍是時清
河司馬房法壽與弟從并州刺史崇吉及冀州刺史崔
道固兗州刺史劉休賓俱至京師以法壽為上客崇吉

為次客崔劉為下客法壽供給亞於薛安都等以功賜爵莊武侯加平遠將軍給以田宅奴婢

孝文泰和十七年齊尚書左僕射王奐子肅以其父及兄弟俱為齊武所殺乃自建業來奔帝虛襟待之除輔國將軍長史賜爵關陽伯肅固辭伯爵許之

十八年十月詔曰比聞緣邊之蠻多有竊掠致有父子乖離室家分絕既虧和氣有傷仁厚朕渾一區宇子育萬姓若苟如此南人豈知朝德哉可詔荆郢東三州勒

勅蠻民勿有侵暴

十九年二月車駕至鍾離軍士擒齊卒三千帝曰在君為君其民何罪於是免歸是年拜光城蠻酋田益員外散騎常侍都督光城弋陽汝南新蔡宋安五郡諸軍事冠軍將軍南司州刺史光城縣開國伯食蠻邑一千戶以益宗十七年自齊歸欵故也

二十二年南討既克宛外城命舍人公孫延景宣詔於南陽太守房伯玉曰天無二日土無兩主是以躬總六

師蕩一四海宛城小戎豈足以懟抗王威深可三思封
侯胙土事在俯仰伯玉對曰外臣最荷國恩忝任疆境
為臣之道未敢聽命伏惟遊蠻遠涉願不損神又遣謂
曰朕親率麾旆遠涉清江此之小戎豈足徘徊王師但
戎路所經纖介須珍宜量力三思自求多福且蒙蕭願
殊常之眷曾不懷恩報以塵露蕭鸞妄言入繼道成願
子了無子遺卿不能建忠烈於君親返立節於逆豎卿
之罪一又頃年傷我偏師卿之罪二今鑿旆親戎清一

南服不先面縛待罪麾下卿之罪三卿之此戍多則一年中則百日少則二旬尅殄豈遠宜善思之後悔無及伯玉對曰昔蒙武帝愷悌之恩忝侍左右此之厚遇無忘夙夜但繼主失德民望有歸主上龍鳳踐極光紹太宗非直副億兆之深望實兼武皇之遺勅是以懃懃懇懇不敢失墜往者北師深入寇擾遑民輒厲將士以救蒼生此乃邊戎常事陛下不得垂責及克宛伯玉面縛而降帝引見伯玉并其參佐二百人特宥之時伯玉從

祖弟三益南陽內附孝文與語善之曰三益三益殊不
惡拜員外散騎侍郎

冊府元龜卷一百六十三

欽定四庫全書

冊府元龜卷一百六十四 宋 王欽若等 撰

帝王部

招懷第二

後魏宣武景明元年正月齊豫州刺史裴叔業遣子芬
之及兄女夫韋伯昕奉表以壽春內附驃騎大將軍彭
城王勰車騎將軍王肅率部騎十萬赴之詔曰叔業明
敏秀發英穎早悟馳表送誠忠高振古宜加褒授以彰

先覺可使持節散騎常侍都督豫州雍兗徐司五州諸
軍事征南將軍豫州刺史封蘭陵郡開國公食邑三千
戶又賜叔業璽書曰前後使反有勅想卿具一二寶卷
昏枉日月滋甚虐徧宰輔暴加戚屬淫刑既逞朝無子
遺國有瓦解之形家無自安之計卿兼茲智勇深嘉乃
勲前即勅豫州緣邊諸鎮兵馬行往赴援楊大眼奚康
王鐵騎五千里言即路彭城王勰尚令肅精卒十萬駱
驛繼發將以長驅淮海雷擊衡巫卿其并心戮力同斯

大舉殊勲茂績職爾之由崇名厚秩非卿孰賞并有勅

與州佐使及彼土人士其有微功片効必加褒異軍未

渡淮叔業病卒芬之以父勲授通直散騎常侍上蔡縣

開國伯食邑七百戶叔業爪牙心膂所寄者裴智并授

中郎將封浚儀縣王昊左軍將軍封汝陰縣趙草左中

郎將封西宋縣叔業姻婭柳玄達輔國將軍封南頓縣

女夫韋伯昕封雲陵縣竝開國男食邑二百戶

玄達頗涉經史

初仕齊歷諸王參軍叔業之鎮壽春委以管記及叔業之被猜疑將謀獻欵玄達贊成其計前後表啓皆玄達

之辭伯斯叔業以其有大志故遣送子芬之為質

李道真右軍將軍陽縣開國

子食邑五百戶故文盛右軍將軍封剛陵縣魏承祖右

軍將軍封平春縣竝開國子各食邑三百戶以叔業司

馬帶汝陰太守李元護為輔國將軍齊州刺史廣饒縣

伯食邑一千戶便道赴職初叔業歸順元護贊同其謀

及叔業疾病外內阻貳元護督率上下以俟援軍壽春

尅定元護頗有力焉又以陳郡太守尹挺為輔國將軍

南司州刺史譙郡太守楊令空為輔國將軍南兗州刺

史皆以叅叔業歸誠之謀也

三年三月南齊鄱陽王蕭寶寅以梁高祖既克建業殺其兄弟將害寶寅來奔壽春四月以寶寅為鎮東將軍東陽州刺史封齊王閏四月詔曰寶寅深識機運歸誠有道冒險履屯投命降闕微子陳韓亦曷以過也可遣羽林監領主書劉桃符詣彼迎接其資生所須之物及衣冠車馬在京邸館付尚書悉令豫備及至京師帝禮之甚重

正始元年詔中山王英所執梁冠軍將軍監司州事蔡靈恩等隨才擢敘

永平元年八月冀州京兆王愉反詔赦冀州民雜工役為元愉所誣誤者其能斬獲逆黨別加優賞

孝明孝昌元年齊東昏侯寶卷子贊來奔先是梁武滅寶卷寶卷宮人吳氏始孕匿而不言梁武納之生贊以為己子封豫章王及長其母告之以實贊嘗有來奔之意後為南兗徐二州刺史會帝遣臨淮王彧討之贊密

告誠款夜投戎軍至是屆于雒陽陸見之後就館舉哀
追服三載贊叔父寶寅時在關西遣使觀察聞其形貌
斂眉悲感朝廷賞賜豐渥禮遇隆厚授司空封高平郡
開國公丹陽王食邑七千戶是年北鎮降民二千餘萬
詔給事黃門侍郎楊昱為使分散於冀定瀛三州就食
三年邢杲反於青光之間杲光祿大夫蘭根之甥詔蘭
根銜命慰勞

孝莊永安中宋廬江太守劉宗之子藻與姊夫李嶷俱

來歸賜爵易陽子

後廢帝中興二年韓樓反於幽州樓將王懷知其無成陰結所親叛樓歸國拜征虜將軍第一領民酋長武周縣侯是時樓將薛孤延與懷等密計討樓為樓別帥乙弗醜所覺力戰破醜遂相率歸行臺劉賁表為都督加征虜將軍賜爵永固縣侯

出帝永熙三年二月梁假節豫州刺史南香三毛香舉城內附授以持節安南將軍信州刺史義昌王

西魏恭帝三年梁將王琳遣使來附以琳為大將軍
後周太祖為西魏丞相敗齊神武于沙苑東魏河北郡
守裴杲率其宗黨歸闕帝嘉之賜田宅奴婢牛馬什物
等

叱列伏龜仕東魏為大都督沙苑之敗隨例來降太祖
以其豪門解縛禮之仍以邵惠公女妻之

史寧仕東魏為涼甘瓜三州諸軍事遣使詣太祖請事
太祖即以所服冠履衣被及弓箭甲稍等賜寧謂其使

人曰為我謝涼州孤解衣以衣公推心以委公公其善始令終立功名也

賀若統初為東魏潁州長史大統二年執刺史田迅以州降至長安大祖謂統曰卿以潁州從我何日能忘即拜右衛將軍散騎常侍兗州刺史

高賓初仕東魏為立義都督同列有忌其能者譖之於齊神武賓懼及於難大統六年乃棄家屬間行歸闕太祖嘉之授安東將軍

楊乾運仕梁為車騎將軍鎮潼州令其兄子略將二千
人鎮劔閣又遣其壻樂廣鎮安州仍誡略等曰吾欲歸
附關中但未有繇耳若有使來即宜盡禮迎接會太祖
令乾運孫法雄及使人牛伯友等至略即夜送之乾運
遂令使人李若等入關送款太祖乃密賜乾運鐵券授
持節驃騎大將軍開府儀同三司侍中梁州刺史安康
郡公

扶猛上甲黃土人初仕梁為南雒北司二州刺史封宕

渠縣男及侯景作亂猛乃擁衆自守未有所從大統十
七年大將軍王雄定魏興猛率其衆據險為堡壁特遣
使徵通饋餉而已魏廢帝元年魏興叛雄復率師進討
猛勒兵拒戰雄擊破之猛遂以衆降太祖以其世據本
鄉乃厚加撫納授車騎大將軍儀同三司加散騎常侍
復爵宕渠縣男割二郡為羅州以猛為刺史

任果南安人梁沙州刺史褒之子世為方隅豪族果性
勇決志在立功魏廢帝元年率諸部來附太祖嘉其遠

至待以優禮果因面陳取蜀之策太祖深納之乃授使持節車騎大將軍儀同三司大都督散騎常侍沙州刺史後為始州刺史在任未久果請入謁太祖許之以其方隅首望早立忠節乃進爵樂安郡公

席固襄陽人初仕梁為興州刺史以地來附時太祖方欲南取江陵西定蜀漢聞固之至甚禮遇之乃遣使就拜使持節驃騎大將軍儀同三司大都督侍中豐州刺史封新豐縣公邑二千戶後轉湘州刺史固以未經朝

謁遂蒙榮授心不自安啓求入覲太祖許之及固至太祖與歡燕賞賜甚厚進爵靜安郡公增邑并前三千三百戶

蕭圓肅梁武陵王紀之子紀建號圓肅守蜀太祖師至遂降封戟城郡公又以圓肅有歸款之勲別賜食思君縣五百戶收其租稅

明帝武成初南齊北豫州刺史司馬蕭雄舉州來附帝遣柱國高陽公達奚武與大軍楊忠率衆迎之

武帝保定三年詔曰梁汝南王蕭大封晉熙王蕭大圓
等梁國子孫宜加優禮式分茅土實允舊章大封可封
晉陵縣公大圓可封始寧縣公邑一千戶又加大圓車

騎大將軍儀同三司并賜田宅奴婢牛馬粟帛等

大封大圓

梁簡文子以魏恭帝三年歸太祖至是封焉

建德五年十二月帝伐齊丁巳次并州齊主高緯留從
兄延宗等守并州輕騎走鄴是日詔齊王公以下曰夫
樹之以君司牧黔首蓋以除其苛慝恤其患害朕君臨

萬國志清四海思濟一世之人寘之仁壽之域嗟彼齊
趙獨為匪民乃睽東顧載深長想偽主涼德早聞醜聲
夙著酒色是耽盤游是悅闌豎居阿衡之任胡人寄唇
舌之重棟梁骨鯁翦為仇讎狐趙餘緒降為阜隸民不
見德唯虐是聞朕懷茲漏網置之度外正欲各靜封疆
共紓民厲故也爾之主相曾不是思欲構厲階反貽其
梗我之率土咸未剗及帷幄獻兼弱之謀爪牙奮干戈
之勇羸糧坐甲若赴私讎是以一鼓而定晉川再舉而

推逋醜偽丞相高阿那瓌驅逼餘燼竊據高壁偽定南
王韓建業作守介休規相抗擬聊示兵威應時奔潰那
瓌則單馬宵遁建業則面縛軍和爾之逃卒所知見也
若其懷遠以德則爾難以德綏處隣以義則爾難以義
服且天與不取道家所忌攻昧侮亡兵之上術朕今親
馭羣雄長驅宇內六軍舒旆萬隊啓行勢與雷電爭威
氣逐風雲齊舉王師所次已達近郊望歲之民室家相
慶來蘓之后思副厥成偽主若妙盡人謀深達天命牽

牛道左銜壁轅門當惠以焚櫬之恩待以列侯之禮偽將相王公以下衣冠士民之族如有深知事宜建功立効官榮爵賞各有加隆若下愚不移守迷莫改則委之執憲以正刑書嗟爾庶士胡寧自棄或我之將卒逃彼逆胡無問貴賤皆從蕩滌善求多福無貽後悔璽書所至咸使知聞自是齊之將帥降者相繼封其特進開府賀拔伏思為郡國公其餘官爵各有差又詔高緯及王公以下若釋然歸順咸許自新諸亡入偽朝亦從寬宥

官榮次序依例無失其齊制偽令即宜削除鄒魯縉紳
幽并騎士一介可稱並宜銓錄百年去殺雖或難希基
月有成庶幾可勉

六年正月齊平

陸玄齊大司空騰之子仕齊為奉朝請歷成平縣令齊
平武帝見玄特加勞勉即拜地官府都上士

隋高祖初為周相後梁蕭歸令鴻臚卿柳莊奉書入關
時三方構難高祖懼歸有異志及莊還謂莊曰孤昔以
開府從役江陵深蒙梁王殊眷今主幼時艱猥蒙顧託

中夜自省實懷慙懼梁主奕葉重光委誠朝廷而今已
後方見松筠之節君還本國幸申孤此意于梁主也遂
執莊手而別時梁之將軍咸潛請興師與尉廻等為連
衡之勢進可以盡節於周氏退可以席卷山南唯歸疑
為不可會莊至自長安具申高祖結託之意歸深以為
然衆議遂止

唐高祖初為唐公舉義兵於太原五原太守張長遜遣
使歸附帝甚嘉之授光祿大夫封安化郡公及至河東

縣賊帥孫華謁帝於汾陽具舟楫以待義師拜華為光祿大夫前軍總管既入關鄭縣令段確以縣來降拜御史大夫渭北賊帥李仲文遣使歸附拜上柱國襲父真爵為普寧鄉公弘農賊帥張士貴以所統精兵及戶口簿帳遣使送款拜右光祿大夫

義寧元年十二月河北郡守蕭瑀與梁泉令豆盧寬率郡內文武官歸國授瑀光祿大夫上柱國封宋國公食邑三千戶加寬銀青光祿大夫仍遣河北撫慰

二年四月賊帥王君廓以衆歸國拜上柱國假河內太守封常山郡公食邑二千戶尋轉遼州刺史封上谷郡王

六月隋安陽令呂珉以相州來降拜相州刺史

七月榆林賊帥郭子和遣使來降拜為靈州總管

八月涼州賊帥李軌遣使來請降以軌為涼州總管封

涼王

十月李密為王世充所敗率衆二萬來降高祖禮之常

呼為弟拜為光祿卿上柱國封邢國公

十一月隋東郡丞王軌以滑州來降拜滑州總管

十二月隋襄平太守鄧暠以柳城北平二郡來降以暠
為營州總管

武德二年閏二月辛丑可達寒賊朱粲遣使請降命前
御史大夫段確使於粲

王世充將李公逸來降拜上柱國杞州總管陽夏郡公
邑二千戶公逸黃人也隋末喪亂與其族弟善行客居

雍丘以義勇為人所附初歸王世充知其必敗遂間遣使請降遂有是命因以雍丘置杞州

七月海岱賊帥徐圓朗以數州之地遣使請降即授兗州總管是月王世充遣其將羅士信侵穀州士信率其衆千餘人來降世充遣步騎五千躡之不及帝素聞其勇及是大悅遣使迎勞賜物五千段廩食

上音稟
下音嗣

其所

部焉

九月王世充將張鎮州侵南陽帝遣使者諭之仍拜鎮

州為右武侯大將軍是月以和州賊杜伏威為淮南道
安撫大使和州總管伏威大業末越王侗以為東道大
總管封楚王太宗之圍王世充遣使詔之伏威請降故
有是拜

三年正月黎州總管李世勣於寶建德中自拔來歸帝
大喜遣使迎勞之詔授黎州總管上柱國萊國公尋加
右武侯大將軍改封曹國公勣本姓徐賜姓李氏賜良
田五十頃甲第一區

三月以石州賊帥劉季真為石州總管賜姓李氏封彭山郡王

四月戊午太宗討劉武周于栢壁其將尉遲敬德與宋金剛來拒王師敬德屯介休帝擊金剛大破之追奔至於介休乃遣宇文士及任城王道宗等往諭敬德遂舉城來降太宗大悅賜以曲宴授秦府統軍

六月以和州總管淮南道安撫大使杜伏威為總管江淮以南州諸軍事揚州刺史東南道行臺尚書令上柱

國封吳王食邑五百戶賜姓李氏附屬籍

七月王世充右建威將軍田世開來降帝嘉之待遇甚厚

九月甲午王世充將張鎮州來降拜左衛將軍封黃國公食邑三千戶

戊申高開道遣使來降乃下詔曰褒德叙功有國彛訓任賢賞善列代通規偽燕王高開道家本海隅志懷慷慨有隋之末州域彫殘招集徒旅自保邊塞繕修斥候

捍禦寇戎民吏肅清倉庫完實既而審達機變遠慕朝
風闔境獻誠歸款內屬清中經略輯寧燕代厥功以茂
宜從褒寵禮命之善用超常級可使持節蔚州諸軍事
蔚州總管加授上柱國賜姓李氏上籍宗正封北平郡
王食邑五千戶是月王世充豫州豪右楊仲達以三州
之地來降拜仲達為上柱國賜食邑三千戶其子行規
為豫州總管行模為息州刺史

四年正月竇建德行臺尚書令胡大恩以大安鎮來降

詔曰疇庸旌善哲王彞訓任賢使能有國通典胡大恩
往因隋季夷狄交侵繕甲聚徒輯寧邊境既而阻隔戎
寇自保方隅遠慕朝風因機立效摧破凶黨亭徼無虞
抗疏闕庭以申誠節忠義克舉宜隆寵命因其所統即
加榮秩可使持節代州諸軍事代州總管加授上柱國
封定襄郡王食邑五千戶賜姓李氏上屬籍宗正

五月周法明以蘄春等四郡之地歸國拜黃州刺史封

譙郡公

初法明依李密
密敗繇是來降

是月竇建德所署右僕射裴矩將建德之妻及傳國大璽來降封矩安邑縣公

六月海州賊臧君相以五州來降拜海州總管

八月詔曰三楚之地江山遐阻五嶺之表經塗遼曼自有隋失馭盜賊交侵聲教莫通方隅隔絕朕受圖膺運君臨區宇率土之濱情均撫字方今函夏寧乂文軌大同尉候無虞要荒率職然而江蠡之派咸阻寇戎閩寓之鄉未聞正朔左武侯將軍黃國公張鎮州大將軍合

浦縣公張知略二方首族早從歷任思展誠效輯寧州
里鎮州可淮南道行軍總管智略可嶺南道行軍總管
以安撫之

九月甲子偽吳王汪華以黠歙五州之地來降華隋大
盜汪寶權之族子也大業末為山賊有兵一萬至是拜
歙州總管封越國公丁卯文登賊帥淳于難率衆來降
以其地為登州拜難為登州刺史上柱國封萊國公食
邑三百戶

十二月遣安撫大使李靖徇嶺南諸州皆下之詔襄州道行臺兵部尚書劉瞻綏集嶺南

五年二月江南賊帥張善安以虔吉等五州之地來降拜洪州總管邳國公

四月隋鴻臚卿甯長真以寧越鬱林之地來降以長真為總管長真世為渠帥其父猛力陳末為太守陳亡猛力自云與叔寶同日生當為天子不肯入朝隋師討之阻瘴不能尅猛力卒以長真為刺史隋師之討林邑也

長真攻畢役諸部落得數千人從征遼左煬帝嘉之拜
鴻臚卿大業十年遣還嶺表為安撫大使遇隋亡以其
地歸於蕭銑帥五越之衆攻丘和於交趾至是來降交
趾之道自此始通也

五月隋日南太守李暉遣使請降以暉為南德州總管
是年七月丁酉隋漢陽太守馮盎以越南之衆來降高
祖以其地為高羅等八州仍授盎高州總管累封國公
拜其子智載春州刺史智彘東合州刺史尋徙封盎耿

國公盎北燕人也初馮弘投高麗也遣其子業以三百人浮海歸宋遇弘為魏所滅業留居番禺之新會其孫融梁初仕羅州刺史其子寶娶越女沈氏為妻因為南越首領自融至盎代為牧守隋末高涼通守沈寶輒反盎擊破之因北吞廣州西并蒼梧南牧朱崖之地自稱總管至是來降嶺表悉定矣

郭孝恪隋末率鄉曲數百人附於李密因與李勣守黎陽密敗勣令孝恪入朝送款高祖授上柱國封陽翟郡

公宋州刺史令與李勣經營武牢巴東新德州縣委以
選補

丘和隋大業末為交趾太守隋滅遂以州從蕭銑及銑
平和以海南之地歸國詔使李道裕即授上柱國譚國
公文州總管和遣司馬高士廉奉表請入朝詔許之

楊恭仁大業末為宇文化及所署吏部尚書隋至河北
為化及守魏縣時元寶藏據有魏郡會行人魏徵說下
寶藏執恭仁送于京師高祖甚禮遇之拜黃門侍郎封

觀國公

李襲志隋末封始安郡公守本郡經二年而無援卒為
蕭銑所陷銑署為工部尚書檢校桂州總管武德初高
祖遣其子玄嗣齋書召之襲志乃密說嶺南首領隨永
平郡守李光度與之歸國高祖又命間使齋書諭襲志
曰卿昔述久在桂州仍屬隋室運終四方圯絕率眾保
境未知所統朕撫臨天下志在綏育眷彼幽遐思沾聲
教况卿朕之宗姓情異於常一家弟姪竝立誠效公又

分遣首領申諭諸州情深奉國甚副所望卿之子弟並據州縣俱展誠績每所嘉歎不能已已今竝入屬籍著于宗正

張長遜仕隋為五原太守天下大亂遂附於突厥與莫賀咄設結為兄弟以自固突厥號長遜為割利特勤及義兵起遣使歸附高祖甚嘉之授左光祿大夫封安化郡公

李藝隋末為幽州總管聞高祖踐祚藝謂官屬曰建德

開道皆劇賊耳宇文化及弒逆無道吾皆不能從之唐公起兵事符衆望入據關右自古必成吾率衆歸之意已決矣會唐使張何傳檄至薊藝奉表歸國於是璽書封王賜姓李氏

席辯字令言隋末寓居東郡及王世充僭號署辯為左龍驤將軍辯私謂偽將楊虔安李君義等曰充雖據有雒陽無人君之量大唐已定關中即真主也乃共虔安君義等遣使入京密申忠款高祖欲發兵攻雒陽潛令

以書召辯辯奉書即帥部兵入京

李育德趙郡人也祖諤隋通州刺史寓居武陟隋末亂乃繕脩器械嬰古城以自保遠近多附之王德仁等攻之皆不能克后聞隋滅與河內郡掾柳燮河陽都尉獨孤武都同降李密以育德為總管及密為世充所破育德以城歸國拜陟刺史

盧祖尚少以俠氣聞為州里所歸屬宇文化及之亂遂舉兵據郡國自稱刺史尋附東都越王侗署為光州總

管沈國公后遇世克篡位遂與之絕遣使歸國因復其
本任封弋陽郡公

田留安初為王世充征南將軍大被恩遇然陰謂所親
曰吾嘗聞李氏當王天下今長安威德日隆天人所尚
吾知歸矣遂率所部二千人來降高祖大悅拜上柱國
雲麾將軍封懷化郡公賜物七百段太宗在藩引為右
四統軍從擊宋金剛徐圓朗皆有戰功

太宗貞觀元年五月乙丑常安賊帥苑君璋以衆來降

拜隰州都督君璋初為劉武周腹心武周又歸突利可汗后見頡利政亂災異屢起知其必敗乃率所部來降頡利遣兵追躡逆擊走之至太州遣子孝政先入朝以是拜為都督封國公邑三千戶賜帛四十疋

十月以嶺南首領馮盎談殿等尚阻兵更相侵掠時議者多請發兵擊之帝不許因遣員外散騎侍郎李公掩持節宣諭之使者所至之處溪洞酋領皆來聽命南方悉定盎遣子智載奉表入朝帝嘉其誠欵賞賜累至拜

衛尉少卿

九年十二月吐谷渾王慕容順為其下所殺國中大亂
乃下詔曰近以吐谷渾恃其遐阻屢擾疆場肆行凶虐
種類乖離爰命將士申茲弔伐有征無戰所向摧殄渠
魁竄迹自貽滅亡朝威遠暢邊庭靜謐朕君臨寰宇志
在含弘不欲因彼危亂絕其宗祀乃立僞主之子大寧
王慕容順撫招餘燼守其舊業而順曾不感恩遽懷二
志種落之內人畜怨憤遂創大義即加勦絕雖復權立

其子所部又致擾亂競動干戈各行所欲朕憂勞兆庶
無隔夷夏廼矐西顧良用矜惕若不星言拯救便恐塗
炭未已兵部尚書潞國公侯君集等咸才兼文武寄深
內外嘉謀著於廟堂茂績書於王府必能宣風闡外克
定遐方可量其事機綏撫經略分遣使人明加曉諭如
有不遵明旨敢興異志即合精銳隨便翦撲盡滅懷之
道稱朕意焉

十六年正月乙丑遣使往西州撫慰其舊首望有景行

淳直者量擬騎都尉以下官奏聞百姓疾患賜醫藥老病惇獨糧食乏絕者咸加賑給

十九年六月伐遼東命諸將攻白崑城臨其西北城主孫伐音請降遂受降帝以白崑城為崑州以孫伐音為中大夫守崑州刺史上輕車都尉賜帛一百疋馬一匹衣襲金帶一同謀而降者並賜戎秩及諸衣物焉

肅宗至德元年七月甲子即位於靈武赦書應逆賊李林甫王鉞楊國忠近親合累者不在免限百姓官吏能

率親屬去逆歸順有官加其優獎斬得逆賊父子不問首從當錫茅土別有褒崇

二年十二月安祿山偽范陽節度使史思明遣使以兵八萬上表來降嘉之授御史大夫兼范陽節度使令使統所部以討殘寇

三年正月庚子滄州刺史烏知洽延王傳樊澄竝背逆歸順知洽為雒州刺史澄為涼王傅二月癸卯偽淄青節度太常卿兼御史大夫能元皓及子偽太子家令昱

背逆歸順有詔嘉其忠義以元皓為銀青光祿大夫鴻臚卿攝御史大夫充河北招討使子昱朝散大夫守太僕少卿

乾元元年三月丁巳逆賊軍將幽州節度副使特進獻誠王阿史那承慶特進左威衛大將軍安守忠左羽林大將軍順化王阿史那從禮蔡希德李庭訓符敬等使人齎表狀歸順詔曰承慶可太保封定襄王守忠可左羽林大將軍封歸德郡王從禮可太傅封歸義郡王希

德可德州刺史庭訓可邢州刺史敬可雒州刺史

十月甲辰帝御宣政殿册成王為皇太子詔大赦天下
令餘寇未殄有脅在賊中未歸順者一切不以為罪其
受賊節制能以兵降者酬其封爵

二年五月丁卯河北破賊生擒賊八人來獻帝竝釋之
各賜乾元錢十千文及噐仗一副馬一匹絹一束竝放
歸賊中勅之曰任汝所適八人皆刺臂為盟約誓梟賊
首以報聖恩

九月史思明寇陷雒陽叔冀守汴州戰不勝與董秦降
思明十一月甲子以開府儀同三司兼殿中監董秦封
隴西郡開國公食邑三千戶仍賜姓李氏改名忠臣為
秦陷賊歸順故罷之也

十月賊將高庭暉投降自五臺府果毅拜特進兼右武
衛大將軍李日越投降授特進兼右金吾衛大將軍員
外置同正

上元二年正月詔曰比緣寇盜之內干戈脅從白刃臨

頸胡寧忍決所以陷於兇黨苟免者多前後詔書頗已該及其史思明將士及偽署官屬等有束身歸順并率衆來降官爵如初一無所問以城邑降者仍別加封爵餘兇黨之流亦同此例天寶臨照朕無食言

五月甲午逆賊史朝義下偽滑州刺史兼鄭汴等節度使令狐彰斬逆賊大將軍二人并破杏園渡口賊二千餘衆以滑州歸順帝嘉之拜滑州刺史攝御史中丞充滑邢德貝相魏六州節度使仍加銀青光祿大夫

九月壬寅赦書其史朝義若能翻然改圖背逆歸順罪無所問加以勲封

元年建丑月賊中官游少連蘓茂珍等歸降以少連為驃騎大將軍兼少府監員外置同正員仍封臨雒縣公茂珍為左金吾大將軍員外置同正員仍封扶風縣王代宗寶應元年八月劔南狂賊徐知道麾下將李忠勇殺知道以降劔南州縣盡平帝以忠勇為蜀州刺史封臨晉郡王賞功也

十月東都平史朝義逃奔汴州賊將張獻誠不納舉所
統兵歸國詔拜汴州刺史充汴宋節度

十一月元帥雍王上言偽鎮州節度使張忠至以趙定
深鎮易五州歸順拜忠至檢校禮部尚書兼常州刺史
充武德軍節度使賜姓李名寶臣

廣德二年二月南郊大赦天下所有諸色結聚及羗渾
党項等能悔過自陳各歸生業一切並釋其罪其中有
能率先來者仍特加官賞

六月癸未詔曰佐命大臣自天所授納于將相委以腹
心休戚實同始終無易太保兼中書令靈州大都督府
長史單于鎮北副大都護充朔方節度關內度支營田
鹽池押諸蕃部落副大使知節度事六城水運使兼河
中副元帥上柱國大寧郡王懷恩朕之元輔上帝賚予
道備五才能包三傑長策制敵精誠感神夙奉先朝志
平多難援旗朔野扈蹕岐山前驅啓行所指皆克收關
河之襟帶復都邑之衣冠以義斷恩毀家徇國躬擐甲

胄驅馳十年遇戰則酣逢堅必脆總統戎旅通和夷狄
決策東向殲厥渠魁掃清妖氛芟雜通梗海隅萬里一
舉蕩平遂欲息馬投戈坐而論道當朝大政竝以咨之
聽賡載之歌為千古之式移軍汾上方欲凱旋疑隙之
端搆於羣小浮言初起且以強大自嫌邪說又生或謂
功高不賞以滋淹恤因而沉猜撫之若驚諭之未解朕
以白日旌信明神鑒心若有負功臣是大欺天下為人
君者豈有此乎尋聞聚族而謀知欲垂橐入覲其子猶

懷反側更有遷延少年輕桃操履非正私庭跋扈違背
君親朔方義師心如父子怒其懷貳遂共梟懸凶子既
誅大軍方擾倉皇奔竄遠在邉州察其深衷本無他志
蓋緣憂懼遂至於斯眷念之下無忘鑒寐况勲書盟府
像列雲臺錄功念勞豈以小而累大君臣之義情實如
初厚祿榮班固宜仍舊但以河北諸將自竭忠誠朔方
三軍已有管屬不可更置統領復為節制其先任靈州
都督府長史單于鎮北副大都護及河北副元帥朔方

節度等使宜竝停其太保兼中書令上柱國大寧郡王
並如故但當詣闕更復何疑再三言提庶早牽復欲令
方寸懸示萬邦爾無我虞朕言不再久勞于外終必無
成收之桑榆殊未為晚甘言之誘王者不為危而悔之
將何及矣切令宣示遠副朕懷

大歷七年五月制巴南諸州仍歲水旱迫於凍餒或至
流離因有剽竊苟全性命懼刑網之所及姑嘯聚以相
依抑有繇焉蓋非獲已永言其弊用軫于懷如能相率

來歸各安生業並無所問咸許自新宣示中外咸使知悉

十一月詔如聞巴南道州自頃年以來其有結聚或攻陷城邑者申明朝旨曉諭令歸各許自新一切不問庶亦隨材叙用俾效誠勤各復其居勉從所務展歲時伏臘之祀洽宗黨鄰里之懽人之常情當所思慕必在長吏敦率設法安存勸其農耕恤其疾苦如刺史縣令有能政字人民使流亡日還戶口歲益宜委觀察使錄狀

奏聞當別加超獎宣示士庶令知朕意

十一年九月以汴宋節度兵馬使攝節度副使開府儀
同三司鴻臚卿兼御史中丞上柱國蕭國公李僧惠為
宋州刺史充本州團練守捉使仍封合州郡王食邑三
千戶以大中大夫檢校尚書兵部員外郎兼侍御史賜
紫金魚袋高憑為曹州刺史充本州團練守捉使以開
府儀同三司攝鄆州刺史石隱金為鄆州刺史充本州
鎮遏使仍封雒交郡王食邑三千戶李靈耀之叛也僧

惠為之謀主至是相率歸順故有是命

冊府元龜卷一百六十四